

**Jangan Buat Spekulasi Mengenai Tahap Keselamatan Negara - Najib**  
**MStar Online**  
**18 Januari 2016**

**KUALA LUMPUR:** Datuk Seri Najib Tun Razak meminta rakyat negara ini supaya tidak membuat sebarang spekulasi atau menyebarkan maklumat tidak sahih yang boleh mencetus kebimbangan umum berhubung tahap keselamatan negara. Perdana Menteri berkata, agensi keselamatan negara telah diarahkan untuk meningkatkan lagi usaha menangani kemungkinan ancaman keganasan di negara ini susulan serangan pengganas di beberapa bandar besar dunia.

Katanya, kerajaan telah bersetuju untuk mengambil langkah-langkah tertentu bagi menghalang dan mematahkan sebarang usaha pengganas untuk mengganggu gugat keamanan dan keharmonian negara ini.

"Ini termasuk keputusan kerajaan untuk memperkenalkan Akta Majlis Keselamatan Negara (MKN) 2015 yang akan membolehkan kerajaan bertindak dengan lebih berkesan dalam menangani keganasan di negara ini," katanya dalam kenyataan di sini, Isnin.

Katanya MKN, yang dipengeruskannya, memandang dengan amat serius ancaman daripada pengganas yang bersifat keagamaan melampau.

Najib berkata, beliau akan mempengerusikan mesyuarat MKN pada Selasa untuk membincangkan segala langkah keselamatan yang telah diambil serta perkembangan terkini termasuk kejadian keganasan di Jakarta minggu lepas.

"Saya yakin dan percaya setiap rakyat yang cintakan keamanan dan keharmonian akan bersama-sama dalam semua usaha kerajaan menentang ancaman keganasan.

"Kita mesti bersatu padu dalam menangani ancaman pengganas ini," katanya.

Lapan orang - empat pengganas dan empat orang awam - disahkan terkorban dalam insiden serangan keganasan di Jakarta, Khamis lepas.

Susulan insiden itu, Ketua Polis Negara, Tan Sri Khalid Abu Bakar berkata, Polis Diraja Malaysia meningkatkan amaran keselamatan negara ke tahap paling tinggi bagi mengelak insiden seumpama itu berlaku di Malaysia. - Bernama

**Hakcipta Terpelihara © 2016 Star Media Group Berhad (ROC 10894D)**

Source: <http://www.mstar.com.my/berita/berita-semasa/2016/01/18/jangan-buat-spekulasi-keselamatan/>